

Die Arweitsgemeinschaft Flomerschumm bräsendiert:



Nummer "zeh", es iss so weit,
liggt jetzt in eire Händ, ehr Leit -
Flomersch´merr Gebabbel-Dreff,
widder "määd bei AGF".

Mit Verschbeedung, dess iss wohr,
kummt des Heft im neije Johr,
doch gar zu viele Widdrischkeide
war´n nit immer zu vermeide.

Ganz egal, jetzt isses do.

Meer vunn de AGF sinn froh
unn sinn schdolz uff unser Bladd,
dess bekannt iss in de Schdadt.

Leggt sich unsern "OB-Wieder"
owends uff soi Kojer nieder,
lieggt´s uffem Nachtdisch, näawerm
Näscht -

e bissel lache iss jetzt recht.

Nooch ´me lange Daag voll Hetz
liest er gäärn noch e paar Sätz.

Dess entschbannt, befreit de Kobb;
do glabbt am neggschde Daag de
Dschobb.

Genau so geht´s de Leit im Ort -
drum setze merr dess Hefdel fort.

´s iss widder voll mit schääne Sache,
manchmool ernscht, doch oft zum Lache.

Unn, ehr Leit, fällt eisch wass oi,
´s negschdemool do schreib merr´s noi.
Die Firma Dreher druggt´s ferr umme -
dess hämmer dankbar agenumme.

Noch e paar Sätz - zu annre Sache
dess iss jetzt awwer nit zum Lache:

Wer iss dess bloß bei Näwwel unn Nacht
der unserm Ort de Gaar ausmacht?

- im Pavilljon die Bänk versaut,
am Tannebaam die Lichter glaut,
am Wabbedoor die Schilder knackt,
uff dess Patebaamschild - - gritzelt,
unn hier, grad vor e paar Woche,
e Woihnachtsmarktbuud uffgebroche,
wer im Fahrkaadhaisl moot -

g´heert demm nit de Arsch versohlt???

Ferr uns iss dess enn große Fruscht
unn mit de Zeit vergeht die Luscht
sich im Ort zu angaschiere
unn immer bloß zu rebariere.

Die Ähne machen Alles schäh;
die Annre schmeißen druff mit Schdää.

Wer sowass macht, denn lad ich oi
bei de AG debei zu soi;

mitzuhelfe unn zu gschdalde
mit de Junge unn de Alde -

dass Flomerschemm noch schänner iss -
dess weer doch besser, ganz gewiss.

Wammer do soi Graft ausdoobt
werd merr hinnenoh gelobt -

unn g´heert nit, wie´n Randalierer,
immer bloß zu de Verlierer.

Merr kändden lääwe wie die Käänisch -
weern sich alle Mensche äänisch.!

Viel Frääd middem neie Heft winscht

Walter Rupp

DIE KERWEREDD 2000

vumm AGF-Vorsitzende Rainer Hannemann.

Wenn auf dem Feld die Lerche lacht, der Fuchs zum Has' sagt: " Gute Nacht" - wenn die Sunn vom Himmel kracht, die Nacht zum Tage wird gemacht, wenn auf dem Sportplatz vis a vis, Tore fallen wie sonst nie, die Straßen sauber, die Fahnen drauß', wenn Jung und Alt geht aus dem Haus, wenn Mama sich Klamotte kauft, bis Papa sich die Haare rauft, wenn Tausende auf den Straßen stehn', wollen unseren Umzug sehen, der jedes Jahr um diese Zeit, durch die Straßen zieht, ihr Leit'.

Wenn die Prominenz im Ort, vorneweg de Dietmar Borth, anstatt fahren, einmal laufen und dann im Kerwezelt was ..trinken, wenn Miß Strohhut und die Ortsvereine, wenn große Leute und auch kleine, wenn alles lacht und fröhlich ist, wenn man alten Streit vergisst, wenn man singt und wenn man schunkelt, und im Kerwezelt was munkelt, wenn grün/schwarz/rote zusammehocke, ohne sich gleich zu verkloppe, wenn man zusammensitzt und trinkt, weil man anschließend besser singt, wenn die Haardtstoß-Neubürger-Leute mitmachen an de Kerwe heute, weil man dort hat jetzt vernomme, ei mer sinn jo doch willkomme.

Wenn alle wie jetzt zusammensitze, im Kerwezelt beim TuS unn schwitze, weil's draußen warm und hier drinnen voll, wenn jeder gut drauf und die Stimmung toll, wenn die Reitschul sich im Kreis drauß dreht, de TuS-Arno vorm Kollapps steht, wenn trotzdem alles auch so klappt, wie man sich vorher ausgedacht, wenn Hilde Latsch den Taktstock schwingt, damit das TuS-Ensemble richtig klingt, wenn Senior-Oldie-Kicker Bette, steht am Zapfhahn, könnt' ich wette, dass jeder, der ein Bier bestellt, in kurzer Zeit auch eins erhält.

Wenn drauß der Zwiwwelbrunne sprudelt, die Musik die halb Nacht durchdudelt, wenn mancher hier im Kerwezelt, vorzeitig vunn de Sitzbank fällt, wenn mancher will uffs Fahrrad kumme und fällt dann in de Zwiwwelbrunne, ist ramponiert, steht wieder uff, will nochemol uffs Fahrrad druff, nur um wieder hinzufalle unn dut dann noch uff pälzisch lalle: " Fallerie und Fallerei, ei ich hab jo gar kää Rad debei".

Wenn Eppsteiner in Scharen kommen, weil sie unsren Ruf vernommen und bringen auch zu unserm Glück, noch Kerwe-Umzugs-Wagen mit, wenn offen ist, die große Lücke, also die Schwörer-Hans-Gedächtnis-Brücke, wenn Alles strömt zum Kerweplatz und macht fünf Tage lang Rabatz und keinen hält es mehr daheim, dann ist Kerwe hier in Flomersheim.

Beach- Volleyball in Flomersheim, laut Ortsvorsteher soll's so sein und wenn der emool ebbes will, steht kää Telefon mehr still. Sand muß bei in großen Massen, ist auch kein Geld mehr in den Kassen und so hat er sich, es iss net zu fasse, des ganze Feld spendiere lasse. Doch dieses dient nicht nur dem Sport, Owwerwasser fumm Sportplatz fließt dort fort. So hat unser Dietmar, sozusage, zwää Fliege mit (s)einer Klapp geschlaage. Mer soll net uff de Dietmar schenne, so was muß mer erst mol könne.

Vor vierzehn Tagen, Samstags dann, war die Einweihung dran. Mit dabei auch der OB, ei so hatt ich den noch nie geseh, kurze Hosen und nicht bieder, doch ich erkannte ihn gleich „,Wieder"! Ein kurzer offizieller Teil und dann ging's an die Spielerei.

Ein Eröffnungsspiel mit dem OB auf engem Raum, das war Dietmars liebster Traum. Doch

er ging sozusagen baden, hatt am Rücken jetzt einen schweren Schaden, wurde diese Woche operiert, Mann Dietmar, wie iss des bloß passiert.

Drum Dietmar geb' ich dir ein Tip, fahr lieber Ski, das hält dich fit, du bleibst gesund und bleibst auch schlank unn bischt an de Kerwe net krank. Wir wünsche dir Alle gute Besserung, mer kriegen die Kerwe aach ohne dich rum.

Mann, was e Schau, vor einem Johr, der Kerweborsch der iss net klor, ich wär in meiner Kerwe-Rede, so konnt ich's in der Zeitung lese, etwas hart zu Haardtstroß-Neubürger gewese. Ei so en Blödsinn, ich kanns gar net fasse, ich hab' über die Leute kein Wort falle lasse. Im Nachhinein hab' ich gehört, es hat nur einen Mann gestört. Doch wir wollen etwas auf die Beine bringen, drum stehen wir über solchen Dingen. Und wenn ich jetzt durch die Haardtstroß geh, was iss dort alles jetzt so schee. Tolles Feeling, tolle Leute, machten mit beim Umzug heute. Und beim Kerwe-Fußball-Turnier, waren die auch dabei, glaubt es mir. Und viele Fans gleich mitgebracht, es hat uns allen Spaß gemacht. So schnell lernt man sich näher kenne, dut net mehr uffeinander schenne, wir ziehen gemeinsam jetzt an einem Strang, hoffentlich bleibt das noch lang. Drumm begrüßen wir alle mit viel Gedäns, die Haardtstreet-Tigers unn ihr Fans.

Im Wochenblatt da konnt ich lese, in Eppstää wär aach Kerwe gewese unn der Kerweborsch vunn dort, hätt' bisje gefrozzelt über unsern Ort. Man konnt in Eppstää noch so saufe, doch nach Flomerschumm würd' man sich nett verlaufe. Und beim Jahrtausendwechsel, kurz vor Mitternacht, hätt' sich vumm TSV-Saal einer uff de Weg gemacht, ei sei Glimmstengel waren leer, es muß e neues Päckchen her. Man vermutete, der war besoffe, wär wegen einem Päckche Zigarette nach Flomersheim geloffe. Doch ich denke, dass dem nicht so war, der Mann hatte Charakter, dess stell ich hier klar, der wollte de Flomerschummer zuerst „Prost Neujahr“ sa'. Und bei dieser Gelegenheit, so hab' ich vernomme, hätt' er gefragt „derf ich an den Kerwe in Flomerschumm aach wiederkomme?“

Hier sind alle stets willkommen, die unseren Kerweruf vernommen, ich grüße hier im Kerwezelt, Kerwegäst aus aller Welt unn aach die Bürger vunn üwwer de Brück', feiern bei uns die Kerwe mit. Unn an mein Freund Gerhard, also an de Kerweborsch vunn driwwe, hätte ich noch eine Bitte: Riskiere nächstes jahr net so e große Klapp, sonst rasier ich dir persönlich dein Schnorres ab.

Ja das wars mal wieder, liebe Leute, Küßchen, Tschüßchen, Schluß für heute, Miß Strohhut küss ich noch zum Schluß, weil dess en Kerweborsch jo muß.

Unn zu unserm älteste Ehepaar, muß ich aach noch etwas saa, Im Februar, im nächsten Jahr, werden sie ein Diamantenes Paar, wir wünschen Euch viel, viel Gesundheit und noch viel, viel Glück auf Erden, ihr sollt beide mindestens 100 werden.

Liebes Ehepaar Strassner, wenn meine Rede ist zu Ende, gib'ts -meistens - Beifall ohne Ende und diesen Applaus schenke ich euch beiden, das ist meine Art, Ehrfurcht vor dem Alter zu zeigen.

Rainer Hannemann, im August 2000

-- unn dann hott derselbe Rainer Hannemann beim Martinsumzug die 7 Gans verlost. Bei de 5. Gans hodder dere Gewinnerin zugerufe: "Sinn Sie die Gans Nummer 5?" - "Nä", hott se gsaat, "isch bin die Fraa Meier!"


Völkermord in Flomerschumm

"Beese Lausbuwe hänn in de Nacht vumm 5. uff de 6. Mai im Bienehaus vumm Lehrer Dexheimer in Flomerschumm e schlimmes Feier geleggt. Dess Holzhaus hott glei lichterloh gebrennt unn 34 Bienewohnungen sinn Opfer vunn de Flamme worre. 32 Bienevölker sinn grausam in denne Flamme umkumme. Grad noch 2 Völker hänn sich redde kenne.



Dess war zum Groine, wie die gläane Diercher mit brennende Fliggel aus ehrem Schdock gflooge unn dood uff de Bodde gfalle sinn. Kenner hodden mer helfe kenne.

Mojens hänn rund um dess abgebrennde Bienehaus masseweis doode Bienne gelegge. De ganze Bodde war vunn Bieneleiche bedeckt!"



.....Ja., liewe Leser, so hott's am 7. Mai 1900 im "Kuseler Anzeiger" gschdanne unn jetzt am 19. Mai 2000 hott "Die Rheinpfalz - Westricher Rundschau" unner der Rubrik "Vor 100 Jahren" widder dra erinnert.

Anton Pollich

E Fraa aus Flomerschemm war vor kurzem in Frankedahl zum Oikaafe. Dodebei hot se sich ah beim "Müller", dem neije Kosmedigg-Gschäft in de Wormser Schdrooß, e bisschen umgeguggt unn in de Parfiem-Abteilung mit me deijre "Brobe-Duft-Flakoon" gräfdisch oigschbriecht. Dann isse mid dem Buss widder häängfahre. An de Haldeschdell an de Ebbschdääner Brigg isse zusamme mid me äldre Mann ausgschdiehe. Dort hott grad mool widder 's schdäddische Puul-Audo am Räägerigghaldebegge soi duftendie Fracht oigelaade. Der Mann schnubbert unn froogt die Fraa: "Wass schdinkt dann do so penedrant?". Die Fraa guggden ganz entgeischdert ah unn sescht: "Na, heern Se mool, dess iss Schannell Nummer 5!!!"

Walter Rupp

Sunndaag in Flomerschumm


Sunndaagmorge - Flomerschumm.
Schdill iss es um misch herum.
Do - e Lärsch singt uffem Feld -
moin Gott, wie schäh iss doch die Welt.

Vunn Schduddrum heert merr Glogge klinge
unn in meim Herz fangt's a zu singe.
Enn Goggel gräht in Nochbers Gaade
der werdd wohl uff sei Fudder waade.

Die Atzle, fresch unn ugezooge,
kummen uff die Ägger gflooge.
Do driwwe, gugg, hoppelt enn Haas;
jetzt frisst er vunn dem frische Gras.

Die Migge unn die Biene summen
unn wollen garnimmi verschdummen.
Isch sitz uff de Terrass vorm Haus
unn lausch in die Naduur hinaus.

Dess äne wääs isch ganz gewiss,
meer wohnen in em Paradies.



Marianne Nickolaus



E wohres Gschichtl vunn de
Andrea Fuhrmanski aus Ebbschdää.
Sie schafft im Kinnergaade unn werdd als
"Fraa Manski" genennt, weil de Kinner
dess "Fuhrmanski" zu lang iss:

's war noch im Ebbschdääner
Kinnergaade - 's iss schunn etliche Johr
her. In de Frieblingszeit wollt isch mit de
Kinner e Liedsche iwver de sogenannte
Lenz lerne. In ähner Schdroof hääßt's:
"Grillen und Käferlein". Isch froog die
Kinner: "Was sind Grillen??" Kääner
wääßes, uff ämool greischt enn Glääne
in die Runde: "Fraa Manski, isch wääßes
- do duut moin Babbe immer die Werscht
druff!"

ENN OBSCHDLER FERR DE OBA


odder: Do hännse geguggt, die Zillerdaaler

Am Freidaagowend iss Blatzkonzert.

"Nemmt eier Regejagge mit, merr wääs jo nit wies werdd".

An de Poscht grieh merr enn Parkblatz - grad 10 Meder vumm Feschdplatz entfernt. Die Mussigger schdellen die Schdiehl uff die Biehn unn schdimmen e letschdes Mool ehr Inschdrumende. De erschde Beifall brischt los unn schunn schmeddern se die Tiroler Nazionalhymne. De Obmann begrießt die Leit unn ehrt dann die dreue Schdammgäsch, die schunn 10, 20 odder 25 mool in Hippach Urlaub machen. Uns erwähnt er nit, meer kummen nämlich schunn 32 Johr do här.

Dann iss Paus. Zwää Margetännderinne verkaafen CDs, Poschdkaade odder Obschdler. Jeder, wu wass kaaft, macht an de Verlosung mit. Unser gläänie Eva hott grad ehm guude Daag unn schbendiert emm Oba e Schnäbbesel. Der muss dann enn Zeddel mit soim Name ausfille unn in de Hut schmeiße. Jetzt gibt's widder Zillerdahler Mussig. Ach iss dess enn Ohrenschnaus. Korz vor Schluss soll de Gewinner gezooge werre. Alles iss muggsmaiselschdill, wie dess Fräuleinsche vumm Mussiggveroin in denn Hut greift. Sie liest laut unn deitlich vor: "Der Gewinner heißt Rolf Müller". Unner doowendem Beifall marschieret de Rolf uff die Biehn, wu er enn wunnerschääne Blummeschdrauß iwverreicht griggt (der iss wohl ferr misch!) unn enn Obschdler muss er ah noch drinke. Awwer jetzt kummt



die Haubtsach: Er derf die Kabell dirigiere. So, wie wann er de ganze Daag nix annres mache deht, nimmt er de Taktschdock, fuchdelt mit de Ärm rumm unn 2 - 3 heert meer ganz zinfdischie Bloosmussigg. Unn weil's grad so guud geglabbt hott, losst de Rolf zum Schluss die Mussigger noch die "Alde Kamerade" schbiele. Dann verbeugt er sich ganz broffessionell unn die Zuschauer doowen.

Die Uffgab hodder mit Bravuur geleest; war dess war vielleicht e Gaudi.

Merr wääs jo nie wass merr kann, so lang merr's nit browiert hott.

Christl Müller

Grumbeergrischdelscher:

Friehet, wie die Christl (Wirth/Müller) unn isch, die Iris (Cusine vunn de Wirths), noch glää waren, hämmer als die Schuh fortdrage misse, die de Vadder gfliggt ghatt hott. Manschmool hämmer vunn de Leid wass Sießes griehet, wass awwer nit so oft vorkumme iss. Sinn meer dann hämkumme, hott de Vadder ferr uns Grumbeergrischdelscher gebagge.

De alde Härd in de Wergschdadd war ganz schdaawisch vumm Schuhmache. De Vadder hott korz driwwergebloose, hott die Gequellde in Scheiwe gschnidde, hott se ogeleggt unn uff die Härdbladd gedriggt. Wann se schäh braun waren, hämmer se gesse - manchmool mit e bissel Ladwersch druff - dess war e Gedicht!!!

Eier Iris Adam aus Kerschembolande


BLOB E GLÄÄ **BISSEL ERHOLUNG**

's war 1998 Do Herschbd war mool widder so rischdisch zum Färrschde gewese. Dodebei war der unser ledschdie Hoffnung nooch demm doofe Summer. Seit Monade hämmer uns uff e paar Daag Urlaub im "Goldene Ogdoower" gfräät. E Woch ins Allgäu - goldgälwe Blädder an de Bääm, schdrahlende Berge, diefblaue Himmel, herrliche Duure uff die Almhidde unn e Aussicht bis ans Enn vunn de Weld - dess hämmer uns vorgschdellt, besonders noochdem merr in de ledschde Woch uffem Fahrrad jeden Daag e paarmool nass worre sinn. - Endlich wars soweit. Alle Termine unner Dach unn Fach, die Wanderschdegge im Ruggsagg, 's Audo vollgepaggt, so simmer im schdrömende Reje Richtung Alwe gebrummt. Unn tatsächlich, korz hinner Memminge iss die Sunn rauskumme unn ball dennoh hämmer uffem Balgoon ghockt unn uns unser erschdes Bayrisches Bier schmegge losse. Ach, wass gibt dess ferr e schäänie Woch! Am neggschde Moje war de Hochgrat verschwunde; na ja, hammer gedenkt, der werdd schunn widder ufftauche. Peifedegge!! Newwlisch, diesisch unn kalt wars, dann hotts gerejent unn gschdirmt, die ganz Woch lang. Die ähnsich Abwechslung war, dass sich de Nieselreje als in enn Wolgebruch verwannelt hott. Die Berge warn meischdens usichtbar, zwischedurch warn se voll Schnee unn alles war glidschisch. Enn Ausflug nooch Litcheschdää unn an de Bodeseer sinn nadierlich ah ins Wasser gfalle. Achtung jedzd: Am Dunnerschdaagmoje hott die Sunn gschdrahit. Schnell in aller Friehe de Ruggsagg vollgschdoppt unn an de Buss gerennt. Die erschde Drobbe sind grad gfalle. Drotzdem, heit gehts uff

de Berg. Noi in die Gondel unn nix wie nuff. Owwe an de Endschdazion: Kalde, graue Newwelschwaade, Nieselreje. Wie merr dann e Schdigge weider uff die Fluh gegraxelt warn, isses so rischdisch losgange. Schdurm unn Wasser aus alle Rohre unn meer bis zu de Gneschel im Matsch versunke. Jedzd awwer nix wie nunner, denn ganze Weg ins Daal. Unnerwegs hammer dann gemerkt: Mäh wie nass kammer nit werre, 's geht bloß bis uff die Haut.

Am negschde Moje hänn se Schnee gemeldt, bis runner nooch Owwerschdaufe. Näh, hammer gedenkt, noch enn Daag do hogge, dess bringt nix. Meer fahren am Beschde heit schunn hääm. Schnell unser siwwe Sache zsamme-gerafft (dess schdimmt wahrschöinlich nit ganz, isch glaab 's waren eher siwwe-hunnert !) unn nix wie ab. Die Häämfahrt war dann die Grönung vunn demm Urlaub. Freidaag wars unn ah noch Ferieschluss, 's hott gschitt wie aus Kiwwel, Schneedreiwie uff de AudoBahn unn enn Verkehr wie uffme Parkplatz. Ähner hinnerm anner, vierhunnert Kilomeeder lang. Schdoggdunkel wars, dausend Schoiwerfer hänn ähm geblend unn unsern Scheiwewischer hott soin Geischd uffgewwe. Uff de anner Seid hänn die Laschder gschdanne, so lang wie die Chineesisch Mauer. Zwischedurch simmer uff e Bedarfsumleitung ausgewiche, awwer do wars noch schlimmer.

Vunn am zwölfe bis am siwwe hämmer im Audo ghoggt. Irgendwann war merr dann endlich dehääm, gschdreißt, vunn Hunger unn Kobbweh gebloogt unn dodaal ferrdisch mit de Nerve - unn dodebei wollt merr uns doch bloß e bissel erhole.



Walter Rupp

RÄDSEL-UFFLEESUNG AUSEM LEDSCHDE HEFT

SCHDADISTIK aus Nr. 9: Oisendunge 87
dodevunn ferr's Greizworträdsel 46 (45 rischidisch, 1 falsch)
ferr's FZB-Rädsel 41 (23 rischdisch, 18 falsch)

Ferr Uffleesung vumm Rädsel Nr. 9 kummt der Brief vunn de Andrea Fuhrmanski aus Ebbschdää grad recht:

"Vielen Dank ferr eier schäänes, großes Rädsel. Isch bin nämlisch kä echdi Pälzer, isch bin e sogenanndi "Noigeridschi" unn desswege in de Pälzer Schbrooch a noch ned so firm. Zwar hab' isch bei uns im Chor (Concordia Ebbschdää) schunn viel gelernt, wie z. B. Bluggskärschel, Groddegiekser unn so Sache, awwer immer noch net ganz perfekt. Awwer lese kann isch die Pälzer Schbrooch - unn dann ins Hochdeitsche iwwersetze. Unn schunn hab isch die Leesung gfunne unn hab e guudes Pälzer Esse rausgriggt:"

LEWWERKNEBB UNN SAUERGRAUT

Sogar aus Sulawesi in Indonesie hott uns die Inge Pohl die rischdisch Leesung gschiggt, obwohl dort kä Lewwerknebb zu grigge sinn. Sie schreibt noch dezu: *"Do essen die Leit awwer fascht bloß Reis mit Gemies, Geggelscher, Fisch, Flääsch, Salaad unn wahnsinnisch viel Obst - unn dess alles uhne Deschdilazzion!!"*

Die Gewinner sinn uff de Kerwe vunn de Marianne Nickolaus gezooge worre:

1. Preis: **Hans Hauser** aus Flomerschemm (6 x AGF-Sekt)
2. Preis: **Pia Bracht** aus Därgemm (4 x AGF-Sekt)
3. Preis: **Doris Becker** aus Ludwigshafe (2 x AGF-Sekt)

Die Leesungszahl vunn demm "FZB" - Rädsel war: **50**

Dess war wohl nit so äfach, weil fascht die Hälf vunn de Oisendunge falsch waren. Unn so waren ah die Kommendare:

"So viel FZB hab isch noch nie uff ähm Haufe gsehe" (Rosa Peter aus Ebbschdää)

"Beim FZB-zehle bin isch dormlisch worre" (Karl-Heinz Fischer aus Ellerschadt)

"Dess Rädsel hott so rischdisch Schbass gemacht, awwer merr hott die Glotzer schunn ganz weit uffmache misse, dass merr sich nit verzehlt" (Pia Bracht aus Därgemm).

Dess "**Elwedritsche-Lexikon**" hott gewunne: Die Hälf vumm

"Rhoihesse-Palz-Duo", unsern **Walter Wirth** aus Frankedahl/Flomerschemm.

Vunn demm häämer ah noch enn glääne Dialog iwwer e schwergewischdisches Thema:

Isch unnerhalt mich manschmool mit meiner Schwester wegem Abnemme. Do letscht hott se gfröogt: "Hoscht jetzt schunn abgenumme, seit du die Kalorieje zehlscht?" - "Nä", hab isch gsaat, "dess net, awwer isch kann jetzt viel besser rechnet!"

Ach wass schääne Schbielsache



Es war im Friejhohr 1945; ich war grad neun Johr alt. Gewohnt henn mer do aus ins Weike ehrrn große Haus an de Bahn, do wu unne die groß Wertschaft drinn war. Moi Mamme war die glää schwarzhooisch Fraa, die Bauers Lina. Ehr Leit, dess war domols e armi Zeit. Die Franzose waren hier die Besatzer unn henn im Schulhof Zelte uffgschdellet ghatt. Owens ab siwwe hott merr nimmi uff die Schdrooß gedirft - die ganze Leit vumm Haus hänn dann als im Hof uff de Mauer vunn de Brechtels Mine ghockt. Manchmol henn mer Kinner a als mol naus uff die Schdrooß gedirft, um die Balle zu hole, die so weit fortgflooge waren, wann die Franzose vorm Schulhaus Brellball gschbielt henn. Schbielsache henn meer jo gar känni ghatt; vorm Abeeheisel an de Bahn henn mer als mit de Gligger gschbielt odder henn Hickelschers gemacht. In de Eisebahnschdrooß hott's jo so viel Kinner gewwe: 's Liesers ehri, die Haitze Ilse, de Kalle, isch unn die annre in de Schdrooß. Wie gsaat, 's war e armi Zeit unn als Kinner hämmer ah immer Hunger ghatt. Mer henn uns oft am Verladeblatt an de Bahn rumge-

driwwe. Manchmool henn uns die Franzose als mool was gewwe, wanns norre e Kaugummi war.

Äh mool ware mer a widder uffem Verladeblatt, do hot unner me Waggon so e Schachtel geläe, die war de Franzose beschdimmt nunnerrgfallte unn die henn's net gemerkt. Mer Buwe henn die Schachtel unnerm Waggon rausholt - die war halb so groß wie e Schuhschachtel - awwer zum Esse war nix drinn. In dere Schachtel waren lauder so glääne Päggerscher unn in jedem waren drei Luftballone. Ach henn mer uns gfrät iwwer die schääne Schbielsache. Sowas henn mer noch nie gsehe ghat. Mer henn se dann uffgebloose unn mit 're gfunnene Babierkordel zugebunne. Meer waren so 4 Buwe; jeder hot 3 Schdigge uffgeblöse unn dann henn mer se hinnernanner agebunne unn sinn als die Eisebahnschdrooß nunner gerennt bis an de Falter. Wammer so gschbrunge sinn, sinn die Luftballone so schäh gfloge. Mer sinn dann widder nausgerennt an die Bahn. Unnerwegs hen mer als gerufe: " He, mer henn schääne Schbielsache - ach was schääne Luftballone". Isch wäs noch, dass die alt Fra Brenner vorm

Hofedoor gschdanne unn uns ganz bees agegugt hott; mer henn awwer nit gewißt warum. Wie mer dann, isch glab, 's war s dridde Mool, nunnergerennt sinn an de Falter, da hot die Fraa Baumann vorm Haus gschdanne, so mit verschränkte Ärm - des war im Baumanns Fritz soi Mamme. Die hot uns dann zugerufe: "Ehr Buwe, kummt mool her!". Mer sinn dann hiegeunge unn do hot se gsaat, mer sollen hämgehe zu unserer Mamme unn unserm Babbe unn sollen denne mool die Schbielsache zeige, die dehden sich beschdimmt ah fräe.

Wie isch dann häm kumme bin unn hab meiner Mamme die schääne Luftballone gezeigt, hot se mer ähnie gscheiert, hot die Schublad uffgemacht, e Messer rausgholt unn dann hot 's 3 mool geknallt unn moi Schbielsache waren kabutt. Dann hot ses Härdeerle uffgemacht unn all moi schääne Luftballone verbrennt. Ach hab isch gegrint. Jetzt hawisch emol was zum Schbiele ghat, kumm häm, wärr verschlagge unn grigg moi Schbielsach verbrennt. Heit wäas isch warum!

Hans Bauer

Zwää glääne "Episeedscher"

ounn de Heike Mayer aus de Haardtstrooss 10

Isch schaff in änerer Schbaakass und do hot amol moin Kolleesch a Kundin berote. Unn wie der su fertisch wor mim berote, sescht die Kundin : "Isch dät ach noch Geld mitnämme." Do sescht moin Kolleesch: "Gern, wie viel dann?" Do sescht die Kundin: "500 Gramm." Do sescht moin Kolleesch: "Am Stick odda gschniffe?"



En Japaner wor in Köln mem Auto unnerwegs und hot 's geparkt. Damit er's widder find, hot er sich die Strooss, wu er's geparkt hot, uffgschriwwe. Dann hot er sich Köln betracht. Wie er dann widder zu soim Auto wollt, hot er's nimmi gfunne. Do hot er sich gedenkt, do geh isch zur Bollizei, die werd mer helfe - nadierlich hot des der Japaner uff japanisch gedenkt - unn is uff die Bollizei. Die hänn em ach geholfe soi Auto ze finne, awwer es hot werklich lang gedauert. Er hot nämlich uff demm Zeddel schdehe ghatt, dass er soi Auto in de "Oibahnstrooss" geparkt hott.

"Denn Brief do, denn kannscht so nit in de Briefkaschde schmeiße, der iss viel zu schwer. Kleb noch e Briefmark druff" - "Ei, dann isser jo noch schwerer!"

Annre Därfer - annre Sidde

Jetzt hämmer noch enn anonyme Leserbrief, denn der Schreiwor vor lauder Riggsicht uff soi zukinfdischie Schwiegermudder nit unnerschriwwe hott. Normal dedemerr jo sowass in de Babierkorb schmeiße, awwer do schdehen e paar indressante Frooge drinn, die mer unsere Leser nit vorenthalde wollen. Jetzt sinn die altoigsessene Flomerschummer gfordert, die sich mit sowas auskennen. Meer hoffen jo, dass merr aus unserm "Gebabbel-Fän-Greis" e paar bassende Antworte dodezu griggen, dann misse merr allmimanner nit so lang waade bisses negschde Hefdel voll iss.

".....Ich hett gern in dem Bladd, wu als so gratis ins Haus gschneit kummt, so e Art Uffklärungsseid. Es iss nämlich so: Isch bin ned vunn Flomerschumm unn do gibt's so Breisch unn Sidde, die sinn mer net so klar.

Zum Beischpiel: Warum merr an Oschdre unn Pingschde die Fenschder butze muss (in de Biewel hab isch des net g'funne unn moi Mudder hot's immer dann gemacht, wann's needisch war) - odder, warum mer, wann Kerb iss, net wegfahre derf, nur demit des Fahnegelumps draushängt, wu sauschwer iss unn ähm beim Obringe fascht uffs Herrn fällt.

So e Uffklärungsseit iwwer dess Ortslääwe wer escht Klasse.

Ansunschde iss des Bläddel gut gemacht.

Viel Griefß unn macht weider so!"



DANKE

an die Firma Dreher
ferr die viele koschdenlose
Gebabbelhefdeischer

DREHER-PRINTMEDIEN

Hannongstr. 27

67227 Frankenthal

Tel. 06233/27242 - Fax: 06233/27552

Redagzion: AGF-Arweitsgreis "Flomerschummer Gebabbel"

Gsamtschdaldung: Walter Rupp - Februar 2001

Zuschrifte bidde an W. Rupp, Fränsemer Str. 107 odder Fax: 55944